

## NORMATIVA DE USO DOS PAVILLÓNS POLIDEPORTIVOS MUNICIPAIS

Esta normativa vai dirixida a todas aquelas entidades, colectivos e/ou persoas físicas que teñan concedida a utilización dos Pavillóns Polideportivos Municipais.

O obxecto desta normativa é garantir que se realice un correcto uso destas instalacións municipais ao efecto de colaborar entre todos/as a manter os recintos nunhas óptimas condicións de funcionamento.

O uso das instalacións deportivas municipais está suxeito á aplicación da ordenanza fiscal vixente “Ordenanza reguladora do prezo público pola utilización das instalacións deportivas e culturais de propiedade municipal”

### HORARIOS DE APERTURA

O horario tipo de apertura dos pavillóns municipais é o seguinte:

- De luns a venres: das 9:00 ás 14:30 e das 16:00 ás 23:00 horas
- Sábados das 10:00 ás 14:00 horas
- Sábados en xornada de tarde, domingos e festivos: o horario de apertura dependerá dos partidos de competición dos distintos equipos dos clubs deportivos do Concello.

\* Este horario poderá sufrir alteracións na época de vacacións e naqueles supostos concretos que previamente se autoricen por parte do Concello de Ames.

### NORMAS DE ACCESO AO RECINTO

Unicamente poderán acceder ao recinto deportivo os colectivos e usuarios/as que teñan concesión expresa por parte do Concello de Ames. Independentemente desta circunstancia, o/a conserxe da instalación poderá denegar a entrada ao recinto aos/as deportistas e clubs concesionarios —incluso suspender a actividade unha vez iniciada— se considera que existe algunha circunstancia extraordinaria que ao seu criterio o aconselle (exemplo: humidade en pista, pingueiras, deterioracións na zona de xogo, ...). As persoas usuarias deberán seguir as observacións e requirimentos do persoal a cargo das instalacións, estando obrigados/as a cumprir as presentes normas. Os comportamentos inadecuados e/ou vandálicos contra calquera dos elementos do recinto deportivo ou contra outros/as usuarios/as, suporá a expulsión inmediata da persoa ou persoas implicadas. O uso das bancadas durante os adestramentos e as actividades que non son de competición está reservada unicamente para os/as deportistas e membros técnicos dos clubs (adestradores/as, preparadores/as físicos, ...) e, excepcionalmente, para membros da Xunta Directiva da entidade ou persoa expresamente autorizada pola mesma. O resto de persoas (pais, nais, acompañantes en xeral dos nenos e nenas deportistas) poderán facer uso doutras zonas comúns do recinto (sala de espera, ...), se existen. O Concello de Ames resérvase o dereito a anular ou suspender calquera reserva se fora necesario, situación que se comunicaría coa máxima antelación á persoa e/ou colectivo afectado. Non está permitido a entrada de animais, salvo no caso concreto dos cans guía. Non está permitido comer pipas dentro da instalación nin acceder con envases de vidro e/ou cristal, botes ou calquera outro tipo de recipiente contundente.

### VESTIARIOS

Aos vestiarios do Pavillón poderán acceder unicamente os/as deportistas dos clubs e/ou colectivos que teñan concesión de uso da instalación, o corpo técnico e/ou profesores/as, os/as árbitros nos casos de competición oficial e, puntualmente, algún membro da Xunta Directiva dos colectivos con concesión e que debidamente se acredite.

O acceso a vestiarios realizarase con 15 minutos de antelación á hora de uso reservada e con 60 minutos de anticipación no caso concreto de actividades de competición (partidos oficiais). En ningún caso, poderán acceder nenos ou nenas de forma puntual sen que estea presente na instalación o/a adestrador/a ou persoa responsable do grupo. Excepcionalmente, naqueles deportes que estean a traballar con nenos ou nenas menores de 9 anos, permitirase que un adulto acompañe a un neno/a aos vestiarios sempre que a entidade da que dependa o autorice. Os grupos de nenos e nenas de 9 anos ou maiores accederán en presenza unicamente dos/as adestradores/as. As situacións especiais respecto desta norma serán valoradas de forma puntual no Departamento de Deportes. Durante o uso dos vestiarios por grupos ou equipos de persoas menores de idade será obrigatorio a presenza na instalación dun adulto responsable ata que se abandonen. Está prohibido cambiarse en zonas tales como andares, aseos e, en xeral, en

calquera outra dependencia que non sexa un vestiario. Finalizada a actividade en pista, os/as deportistas deberán de abandonar os vestiarios no prazo máximo de 20 minutos. É obrigatorio o uso de chanclas para ducharse e circular polos vestiarios. Por motivos de seguridade, non se permitirá o uso de aparatos eléctricos. Por cuestións de hixiene, non se permitirán as seguintes accións persoais dentro dos vestiarios: depilarse, afeitarse, cortarse as uñas e similares. Tampouco está permitido comer.

### **PISTA DE XOGO**

É importante lembrar que o coidado e mantemento dos recintos empeza por un mesmo. Todos/as os/as deportistas, adestradores/as e demais colaboradores que estean en pista durante a actividade deberán de ter calzado deportivo e indumentaria adecuada e adaptada á modalidade deportiva a desenvolver. O/a deportista deberá traer o calzado axeitado para realizar a práctica deportiva e en ningún caso se permitirá o acceso á pista de xogo con calzado da rúa.

No que respecta ás modalidades de patinaxe, recoméndase que se revisen con certa frecuencia o estado de conservación dos freos e rodas dos patíns para que non xeren problemas irresolubles no chan dos pavillóns que incluso poidan obrigar a suspender temporalmente a actividade. No suposto de que o conserxe da instalación valore que hai algún deportista que ten un patín en mal estado poderá supervisalo en presenza do adestrador/a. De confirmarse, o/a deportista deberá de abandonar a pista de xogo. Queda totalmente prohibido que os/as deportistas veñan cos patíns calzados de fóra xa que, entre outros motivos, poden traer areas ou calquera outro elemento que pode deteriorar as zonas de xogo, en especial, as de tarima.

Non poderá haber botellas de auga na pista. Aqueles deportes que pola súa intensidade e necesidade precisen de auga para que os/as deportistas beban, esta deberá de colocarse nos lugares específicos que indique o conserxe da instalación, que en ningún caso será na zona de xogo.

Está totalmente prohibido cuspir e tirar calquera tipo de lixo na instalación e, en especial, na pista de xogo. Naqueles deportes que precisen empregar algún equipamento específico (postes de voleibol, bádminton, ...) os adestradores e/ou deportistas maiores de idade do club ou colectivo implicado deberán de colaborar neste labor co conserxe da instalación, tanto no momento da súa colocación como na desmontaxe.

Non se poderán manipular os equipamentos deportivos existentes nas instalacións sen autorización do conserxe e sen que este estea presente. Está totalmente prohibido desanclar as porterías de fútbol sala/balonmán e colgarse delas. Cando se manipule algún elemento necesario para a práctica deportiva, como son as tapas que cobren os buracos dos postes de tenis ou voleibol, deberán quedar colocadas debidamente para evitar posibles accidentes nas posteriores prácticas deportivas. No caso das canastras móbiles, á hora de trasladar as mesmas, deberase ter moito coidado para non deteriorar o pavimento da pista de xogo.

Está totalmente prohibido realizar calquera tipo de modificacións na pista de xogo, tales como, pintar ou poñer calquera tipo de cinta adhesiva.

### **PETICIÓNS POR PARTE DOS CLUBS DEPORTIVOS**

Poderán solicitar a utilización das Instalacións Deportivas Municipais todos os clubs ou asociacións deportivas inscritas no Rexistro Municipal de Asociacións, que non teñan ningún informe en contra ou expediente aberto por infraccións cometidas nalgunha Instalación Deportiva Municipal.

- A utilización do uso da instalación debe contar coa solicitude por escrito á Concellaría de Deportes de deportes e a confirmación por parte do mesmo da súa autorización. As solicitudes deben indicar día e horarios de inicio e fin da actividade.
- Os horarios deberán cumprirse sen ningún tipo de ampliación do mesmo aínda que a instalación estea libre.
- Os prazos para a presentación das solicitudes será o seguinte:

a) Uso da instalación para toda a tempada (de outubro a xuño): do 1 ao 31 de xullo.

b) Uso para o período estival (de xullo a setembro): do 1 ao 15 de xuño.

c) Para outros períodos de vacacións escolares: ata unha semana antes do período vacacional.

- As solicitudes con igual demanda de uso, terán prioridade na elección de días e horarios:
  - a. Os clubs ou asociacións que teñan maior número de usuarios e que ocupen a instalación facendo un uso racional da mesma, en canto a usuarios por tramo horario.
  - b. Os clubs que promocionen o deporte de base sobre os que non o promocionen.
  - c. Os clubs que teñan equipos de superior categoría de competición sobre os de inferior. As solicitudes dos equipos serán valoradas pola categoría de competición na que participen.
  - d. A igualdade de categoría de competición, existirá preferencia para os equipos con maior antigüidade e a igual antigüidade, antigüidade na instalación.
  - e. Terán prioridade os clubs que promocionen o deporte feminino.

### **RESERVAS PUNTUAIS DE PISTA “uso libre”**

Enténdese como "uso libre" partidos, xogos deportivos e práctica deportiva en xeral por persoas físicas e non profesionais. As reservas puntuais dos polideportivos para “uso libre” deberán de realizarse nas oficinas do Departamento de Deportes, aboándose a cantidade que proceda segundo cada caso, coas excepcións que a ordenanza fiscal estableza e dentro dos criterios de xestión que o Concello determine.

Para o acceso de "uso libre" aos pavillóns municipais é requisito indispensable ser maior de idade. Os menores só poderán acceder e permanecer nas instalacións acompañados dunha persoa adulta, que será responsábel do uso da instalación. A reserva das instalacións por parte de persoas físicas para o desenvolvemento de actividades deportivo-recreativas de carácter puntual realizarase cunha semana de antelación, é dicir, dunha semana para outra, podendo facerse efectiva a partir dos martes e de calquera das seguintes maneiras:

- Telefonicamente, de luns a venres, en horario das 9:00 ás 14:00 horas, chamando ao 619 842 504 (Casa do Concello de Bertamiráns) e 981 535 940 (Casa da Cultura do Milladoiro)
- Persoalmente, de martes a venres, nas oficinas do Departamento de Deportes en horario das 9:00 ás 14:00 horas.

De facer a pre reserva telefónica, será obrigatorio que a persoa a confirme recollendo o xustificante -antes do venres desa semana- nas oficinas de Deportes de Bertamiráns ou na Casa da Cultura do Milladoiro, en horario de 9 a 14 horas. De non facelo, a hora pre reservada quedaría automaticamente liberada podendo ser novamente bloqueada por outro usuario.

As fins de semana unicamente se farán reservas se existe dispoñibilidade unha vez atendida a competición e demais actividades programadas. A persoa responsable da reserva deberá de identificarse co DNI e presentar o seu xustificante na conserxería do recinto antes de acceder ás instalacións. Cada usuario unicamente poderá reservar unha hora á semana e terá dereito a o uso dun vestiario. O número máximo de deportistas por cada reserva e hora será de 15/16 e o número mínimo será de 7/8. Calquera outro tipo de reserva a realizar por unha persoa física que non se axuste ao indicado neste apartado das normas, valorarase de forma específica polo Concello de Ames.

### **OUTRAS CONSIDERACIÓNS**

Os Clubs e entidades con concesión de uso de instalación para toda a tempada deberán de cumprir a normativa específica e circulares adicionais que no seu momento se lles remita por parte do Concello de Ames e que se consideran complemento ás presentes normas. Os horarios e días reservados para a unha entidade/usuario son intransferibles, non podendo cederse a outro equipo, nin compartirse con outro club/usuario. As situacións puntuais sobre este respecto que se dean ao longo da tempada deberán de ser solicitadas por escrito e precisarán da autorización do Departamento de Deportes.

A entidade/usuario/a poderá perder a súa reserva de instalación se de forma reiterada e non xustificada:

1. Non fai uso da mesma.
2. Asiste cun número moi reducido de deportistas, inferior a 7/8 persoas, salvo causas debidamente xustificadas.
3. Incumpre de forma reiterada cos horarios concedidos para a tempada.
4. Incumpre algunha das normas recollidas neste documento.

A entidade/usuario poderá perder o seu dereito de uso da instalación de forma automática se utiliza a instalación sen autorización previa do Concello.

Os danos ocasionados na instalación ou en calquera dos seus elementos polos deportistas e usuarios en xeral, como consecuencia de actos negligentes ou de accións vandálicas, deberán de ser asumidos e compensados pola persoa ou persoas implicadas. No caso concreto de actividades vinculadas con Clubs deportivos, considerarase á entidade a responsable subsidiaria quedando obrigada a repoñer os danos producidos. A reiteración deste tipo de comportamentos ao longo da tempada suporá a automática anulación de todas as horas de uso das que dispoña a entidade, con independencia do equipo ou persoa que cometa a infracción. Co fin de contribuír e garantir a seguridade de todos/as os/as usuarios/as das instalacións, os/as xogadores/as, adestradores/as e deportistas en xeral deben informar aos conserxes dos desperfectos ou anomalías que observen nos diferentes espazos das instalacións e, moi especialmente, nos equipamentos deportivos que están a utilizar (porterías, canastras, redes...).

O Concello de Ames recomenda a todos os deportistas que pasen un recoñecemento médico previo co fin de garantir a súa saúde.

En caso de existir algunha incidencia ou avaría deberá ser comunicada, o antes posible, á Concellaría de deportes.

O Concello de Ames non se fai responsable dos obxectos extraviados, sustraídos ou esquecidos nos vestiarios ou no interior da instalación. Recoméndase non introducir no recinto obxectos de valor. O Concello de Ames declina toda responsabilidade das lesións que puideran producirse derivadas da práctica deportiva. Enténdese que no momento de facer uso dunha reserva de instalación as persoas usuarias manifestan estar aptos para realizar actividade físico-deportiva. Na conserxería das instalacións hai follas de incidencias e queixas a disposición dos interesados. Para calquera información, dúbida ou suxestión respecto do uso e funcionamento destas instalacións deberán dirixirse ao Departamento de Deportes do Concello de Ames:

- Teléfono: 619 842 504, de luns a venres, das 9:00 ás 14:00 horas.
- Enderezo de correo electrónico: [deportes@concellodeames.org](mailto:deportes@concellodeames.org)

#### OUTROS TELÉFONOS DE INTERESE:

- Bombeiros: 080
- Policía Local: 619 767 575
- Emerxencias 112